



## STINAPA TA INFORMA

### “GENESIS”

Juni Martis ta lanta i drumi ku e bida hotelero. For di 1984 e ta aktivo riba diferente tereno den e bida aki. E stima su 3 yunan i kier lo mehor pa nan. Na 1999 el a habri su ‘truck di hotdog’ pa spar i yuda yega na su soño. I na 2003 esaki porfin a bira realidat: Genesis. Juni ta kuminsá na bisa ku firmesa ku e gusta biba den naturalesa. E ta gusta pasa tur su oranan liber den naturalesa. E ta orguyoso di e echo ku mayoria di nos komo boneriano ta biba ku naturalesa. E ta duna komo ilustrashon loke bo ta tende den ‘boka di pueblo’: “Ma bai mondi.” Of: “Ma bai piska.” Segun Juni e boneriano no ta perhudiká su naturalesa fásilmente. For di chikitu e i su famia a lanta hopi na Lac ya ku su welo i tionan tabata konosido piskadónan ei. Komo tiner el a siña apresíá Karpata. Juni ta konta bou di harimentu kon tur djabièrnè durante oranan di ‘gym’ e tabata ‘spijbel’ pa bai piska ku su amigunan na Karpata. E dia ei den su tas di skol no tabata tin nada di ‘gym’ sino ko’i piska so. Loke e gusta asina tantu di Karpata ta e alrededor i ambiente. Pero tambe sigur e echo ku e naturalesa di tera ta asina serka di laman. E kombinashon perfekto. “Mi ta yam’é Classic Karpata,” Juni ta splika. No ta nada straño pues ku dia el a realisá su soño, esta su propio restaurant, el a skohe, sin basilá, Karpata komo lugá. El a batisá su restaurant ku e nòmber Genesis. E ta splika su eskoho ku pashon: “Genesis ta komienso di tur kos, e ta e promé buki di Beibel. E ta e regalu di bida, e regalu di Dios. Ta algu ku fo’i chikitu ma soña ku n’e. Nos por wak e nòmber tambe for di punto di bista di Karpata: e ekonomia a kuminsá aki ku eksportashon di Watapana, karbon i aloé. Ta parti di komienso di nos historia!” Nos ekonomia ta dependé di turismo. E turista ta bini pa naturalesa ku nan ta konsiderá un di e mihónan di mundu. Nos tur mester buta nos skoudernan bou di nos ekonomia. Segun Juni nos mester embolbí nos mesmas ku naturalesa. Tambe sostené organisashonnan manera STINAPA pa asina nos keda ku e naturalesa mas outéntiko posibel.

*Skirbí pa Natalie Wanga*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALESA



**Traha huntu na un desaroyo duradero pa Bonelru**